

Dragi/e prijatelji/ce,

Predstavljamo vam **oktobarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **179** organizacija i **113** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).



Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

SADRŽAJ

Aktivnosti u oktobru 2015.	2
Planovi za novembar 2015.	4
Aktivnosti članova mreže	5
Saopštenja / donatori / pozivi	18

Uživajte u čitanju!!

AKTIVNOSTI ORC/ hCa U OKTOBRU 2015.

Anna Lindh Fondacija Bosanskohercegovačka mreža

Tokom oktobra ORC je, kao glavna kancelarija ALF mreže Bosne i Hercegovine radio na reviziji i rekonfirmaciji članova bosanskohercegovačke mreže ALF. U sklopu ovoga smo poslali upit pasivnim članicama o njihovom daljem učešću u radu ALF BiH. Isto tako, u mrežu su nam se u oktobru priključile dvije nove članice: **Udruženje „Tuzla live“ i Ambasada lokalne demokratije Zavidovići**. U procesu prijema u ALF BiH nalazi se još šest organizacija.

U okviru ALF poziva za mrežne međukulturalne aktivnosti, odobren je projekat „**Kulturni sajam**“ **DIS Teatra iz Banja Luke**, u saradnji sa članicama ALF BiH. Mrežni projekat će biti implementiran u narednim mjesecima, o čemu ćemo vas na vrijeme informisati u našim sljedećim biltenima, te mejling listama.

U okviru Poziva za projekte, koji je ALF Sekretarijat Aleksandrija objavio ove godine, a na osnovu radionice koju smo održali u Mostaru, u septembru ove godine, nekoliko organizacija – članica ALF BiH je apliciralo za finansijska sredstva. Krajnji rok za on-line apliciranje za projekte je pomjeren za 15. Decembar ove godine.

U periodu od 18 do 20 novembra ove godine u Briselu, Belgija održava se godišnji sastanak šefova ALF mreža, na kojem će Bosnu i Hercegovinu predstavljati nacionalni koordinator ALF za BiH, Miralem Tursinović. Više informacija o sastanku i zaključcima u našem naredom biltenu, kao i na stranici: www.omladina-bih.net

Prekogranična građanska mreža za mir, pomirenje i sigurnost ljudi na Balkanu



Claim!

CITIZEN'S NETWORK FOR PEACE, RECONCILIATION AND HUMAN SECURITY

U sklopu projektnih aktivnosti u ovom regionalnom partnerskom projektu, Omladinski resursni centar (ORC) Tuzla, te naši istraživači iz PRONI Brčko nastavili su terenske aktivnosti na istraživanju „Aspekt ljudske sigurnosti mladih koji žive u kolektivnim centrima, ili „alternativnim smještajima“ u BiH (fokus grupe i intervju u kolektivnim centrima). Posjeta i fokus grupe održane su u izbjegličkom naselju „Prutače“ kod Brčkog, a planira se i posjeta izbjegličkom naselju „Mihatovići“ kod Tuzle. Više o ovome u narednim biltenima i na našoj web stranici.

Završena je i nova – deseta hronika, sa temom „**Imigranti/izbjeglice i BiH**“, u kojoj smo se bavili uticajem priliva izbjeglica iz Sirije, Iraka i Avganistana na političku i socijalno/ekonomsku situaciju u našoj zemlji. Hronika će uskoro biti objavljena na našoj stranici: www.omladina-bih.net

Projekat „**Prekogranične građanske mreže za mir, pomirenje i sigurnost ljudi na Balkanu**“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

Omladinska grupa ORC Tuzla:

„Živi zdrav život vol.2“

U mjesecu oktobru Omladinska grupa ORC Tuzla uspješno je realizovala projekat „Živi zdrav život vol.2“, koji je za cilj imao animaciju građana Tuzle za rekreativnim bavljenjem sportom.

Podsjećanja radi, u prethodnim mjesecima u sklopu projekta realizovani su turniri u košarci i odbojci, te humanitarna akcija darivanja krvi. Omladinski pohod na Vršane je realizovan u saradnji sa Odredom izviđača Tuzla, 4. oktobra 2015.



Nakon svih nabrojanih aktivnosti uslijedila je završna manifestacija projekta. U Toku manifestacije predstavljeni su ciljevi i rezultati projekta, uručeni certifikati najboljim učesnicima turnira, podijeljene zahvalnice sponzorima „Kobens voda“ i „Rio sokovi“, te Fondaciji tuzlanske zajednice.

CEO Konferencija



24.10. je u Tuzli održana međunarodna konferencija CEO, sa ciljem promocije poduzetništva. Na konferenciji su se prisutnima obratile osobe sa bogatim iskustvom u karijeri, s ciljem buđenja i pokretanja mladih osoba na dalji napredak u karijeri.

Ispred ORC prisutni su bili Slobodan Blagovčanin, Admir Isanović, Adi Selman i Jasmina Begović.

Trening program za organizacije civilnog društva „Podrška pravnoj zaštiti žrtava diskriminacije“

15.oktobra 2015. godine u Sarajevu organizacija „Prava za sve“ realizovala je trening „Pružanje informacija i podrške korisnicima koji su moguće žrtve diskriminacije“. Ovaj trening imao je za cilj da educira mlade aktiviste i aktivistkinje kako da pruže praktičnu pomoć žrtvama diskriminacije. Ovaj trening je obuhvatao dva modula. Prvi modul fokusira se na osnove korištenja mehanizama zaštite od diskriminacije prema ZZD, posebno na zaštitu u postupcima pred Institucijom ombudsmena za ljudska prava BiH i mogućnostima za učešće organizacija u sudskim



postupcima. Drugi modul se fokusira na razvoj kapaciteta organizacija civilnog društva za pružanje informacija i podrške korisnicima koje su moguće žrtve diskriminacije. Ovom treningu prisustvovalo je petnaest učesnika iz raznih djelova Bosne i Hercegovine. Omladinsku grupu Omladinskog resursnog centra Tuzla predstavljala je Sokoli Merita.

U toku ovog mjeseca koordinatori grupe su pristupili zadatku planiranja razvoja grupe u narednih 6 mjeseci. Plan će biti predstavljen svim članovima grupe na narednom sastanku i biti ponuđen na glasanje. Plan za cilj ima poboljšati koordinaciju među članovima grupe, povećati vidljivost grupe i olakšati napredovanje svim članovima.

Planirane aktivnosti OGORC-a za mjesec novembar:

Nakon što je projekat “Živi zdrav život” završen, pred Omladinskom grupom je zaslužen period odmora koji ćemo iskoristiti za zajedničke Team building aktivnosti u svrhu bolje adaptacije novih članova.

Redovne aktivnosti:

Tokom oktobra smo u sklopu naših redovnih aktivnosti radili na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti), održavali i redovno dopunjavali informacije na našoj web stranici www.omladina-bih.net, slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima), vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim je aplicirao za projekte za narednu godinu.

PLANOVI HCA/ORC-A ZA NOVEMBAR 2015.

ERSTE Fondacija NVO Akademija

ERSTE fondacija organizuje i implementuje Regionalni program NVO akademije 2015/2016. Program je podijeljen na dva dijela, od kojih prvi dio počinje u oktobru 2015. godine. U okviru ovog programa nudi se 12 obuka na 6 jezika koje će se odvijati u 6 gradova u centralnoj i Jugoistočnoj Evropi. Njihov sadržaj obuhvata različite važne teme, od razmišljanja o projektovanju do upravljanja projektom i prikupljanja sredstava. U sklopu ovog Regionalnog Programa ORC Tuzla dobio je poziv od ERSTE Fondacije da prijavi svoje članove na edukaciju. Sukladno pozivu ORC tim nominovao je četiri osobe na radionicu „Kako uspješno provesti projekat finansiran od strane EU fondova“, koja će se održati u Zagrebu 23 - 24.11. 2015 godine. ORC Tuzla će predstavljati: Merita Sokoli, Muharem Gaši, Slobodan Blagovčanin i Boško Vlajić.

- **Sprovođenje redovnih aktivnosti kroz Omladinsku mrežu BIH.**
- **Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu (nastavak rada na istraživanju – organizovanje sastanka sa stakeholderima).**

Više informacija na: posta@omladina-bih.net

AKTIVNOSTI ČLANICA OMLADINSKE MREŽE BIH



OMLADINSKO UDRUŽENJE NOVA VIZIJA

Opara bb, 72 290 Novi Travnik

Tel./fax: 061 309 687, 061 593 773

E-mail: ounovavizija@gmail.com

Facebook: <https://www.facebook.com/ounovavizija>

U prisustvu velikog broja mladih, predstavnika lokalne zajednice, predstavnika nevladinih organizacija i medija u Novom Travniku je 6.10.2015 svečano otvoren Omladinski centar. Zahvaljujući velikim naporima volontera Omladinskog udruženja Nova vizija, mladi su u samo tri mjeseca uspjeli renovirati i moderno opremiti Omladinski centar, te samim tim stvoriti prostor za realizaciju ideja mladih. „Nova vizija“ je, zahvaljujući donatorskim sredstvima udruženja „Narko Ne“ i općine Novi Travnik, u prethodnom periodu uspjela renovirati kongresnu (trening) salu, skladišta, toalete, kancelarije - te mladima osigurati prostor za brojne sadržaje. Posjetioci nisu krili svoje oduševljenje nakon prikazanog stanja prije i nakon renoviranja centra. Načelnik općine, Refik Lendo, čestitao je mladima na ovoj pozitivnoj promjeni, te Omladinski centar proglasio i zvanično otvorenim, a mlade pozvao da budu još aktivniji u zajednici. U sklopu svečanog otvorenja upriličena je i prezentacija likovnih i literalnih radova učenika na temu „Ja sam najvažniji/a“, a s ciljem obilježavanja „Nedjelje dječijih prava“ koju rukovodi JU Centar za Socijalni rad.



Nova vizija će uz koordinaciju sa općinom Novi Travnik, predstavnicima nevladinih organizacija i obrazovnih institucija u narednom periodu kreirati brojne zanimljive sadržaje za mlade u ovom gradu te nastaviti pozitivnu priču.



Omladinsko udruženje Nova vizija :

„Budi dio tima koji stvara i realizuje ideje“

Youth Association New Vision:

„Be a part of the team that created and implemented ideas“

Kontakt:/Contact:

ounovavizija@gmail.com

Facebook: <https://www.facebook.com/ounovavizija>

Skype: Vizionari2014



ERNADA AVDIBEGOVIĆ, član Omladinske mreže, pojedinac
VIJEĆE MLADIH OPĆINE KLADANJ
 E-mail: erna_begovic20@yahoo.com

Poduzetništvo

Dana 12.10. 2015. udruženje Omladinski krug Kladanj je u saradnji sa udruženjem žena "Podrinje" - Vlasenica učestvovalo na Prvom sajmu poljoprivrednih proizvoda u Vlasenici. Općina Vlasenica je svim učesnicima obezbjedila besplatan štand u pokriveno prostoru, a udruženje Omladinski krug Kladanj je organizovalo besplatan prevoz za žene i djevojke sa malim biznisom. Poslije sajma žene su se nastavile družiti sa ženama iz udruženja žena Podrinje - Vlasenica. Ove aktivnosti su održane u okviru dio PRO budućnost zajednica.



Građanski aktivizam



Ženska inicijativa **Pro budućnost** Kladanj je 14.10.2015. organizirala javni zbor građanki uz podršku udruženja **Sara** iz Srebrenice. Na javnom zboru su prisustvovala neformalne grupe građanki, žene zaposlene u općinskim strukturama i aktivistice u udruženjima građana. Javni zbor je održan sa ciljem da se usmjere sredstva u iznosu od 2.000 KM na najprioritetnije oblasti. Na javnom zboru žene su iznijele brojne probleme iz svojih mjesnih zajednica, a ovoga puta su prijedlozi ekološkog karaktera dobili najveću podršku.

U organizaciji Udruženja žena Podrinje - Vlasenica i udruženja Omladinski krug Kladanj, 20.10 je organizirano

predavanje i diskusija o temi "Uloga žena u izgradnja mira ". Ernada Avdibegović - predsjednica Omladinskog kruga Kladanj održala je prezentaciju o temi: "Upoznajmo mirotvorke". Gđa. Desa Nikolić je ispred Udruženja žena Podrinje - Vlasenica predstavila planove za budućnost i nagovijestila saradnju sa ženama iz Kladnja i u narednom periodu.

Kultura

JU Biblioteka Kladanj je 21.10. organizirala je obilježavanje Mjeseca knjige pod sloganom: "Knjigom do dijaloga". Tim povodom je organizirano druženje djece nižih razreda osnovnih škola i vrtića sa pjesnicima i piscima. Učešće na ovoj manifestaciji je uzela i biblioteka iz Vlasenice „**Vuk Karadžić**“. Posebno zapažen nastup je imala gđa. Ifeta Hrnjić, koja je recitovala pjesme iz svoje nedavno objavljene zbirke poezije.

Javna tribina - Moja priča

Dana 28.10.2015. u sali Općinskog vijeća Kladanj održano je još jedno u nizu javnih govorenja, gdje su bivši logoraši iz svih konstitutivnih naroda u BiH iznosili svoje priče o stradanju, i poglede na rat. Na ovoj tribini su učešće uzeli učenici iz srednjih i osnovnih škola, prosvjetni radnici, predstavnici udruženja, općine i medija. Ovo je je još jedna u nizu aktivnosti koje se bave suočavanjem sa prošlošću. Ova aktivnost je dio **PRO Budućnost** projekta.



OMLADINSKA ORGANIZACIJA "SVITAC"

Jusufa Čampare bb, 76 100 Brčko Distrikt

Tel./Fax: 049 211 032

Email: svitac@teol.net

Web: www.svitac.org

Facebook: www.facebook.com/omladinska.svitac

Kreativne radionice



je 25 učesnika pohađalo kreativne radionice.

Omladinska organizacija Svitac je u oktobru nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim radnim danom od 11:00-13:00, a uzrast 8+ od 14:00-15:30 časova. Grupa sa mališanima od 4-7 godina je pravila otiske ruku u tijestu, koje su potom bojili, origami lepeze, dvoglede od kartona, dekoracije i razne predmete od gline. Takođe su svakog ponedjeljka učili osnove engleskog jezika, koristeći bojanke za učenje boja i nazive povrća. Učenje je olakšano kroz pjevanje. Cilj ovih radionica bio je da mališani razviju maštu i da koristeći razne materijale izraze svoju kreativnost, takođe da razviju poštovanje prema drugom i usvoje lijepo ponašanje. U oktobru

je 25 učesnika pohađalo kreativne radionice. Za poslijepodnevnu grupu (uzrast 8+) usvojen je novi raspored aktivnosti. Ponedjeljkom je bio na rasporedu engleski jezik (alfabet, izgovor i dijelovi tijela). Utorkom kreativno izražavanje, kreiranje velikog banera koristeći akrilne boje kao dobrodošlicu novim međunarodnim volonterkama iz Njemačke, pravljenje šarenog držača od kartona za olovke i razne figure od gline i plastelina. Srijedom je održavana muzička radionica, gdje su učesnici imali priliku da uče osnove sviranja na trubi, gitari ili klaviru i razvijaju sposobnosti komunikacije i dijaloga na temu ritam, note i razni pravci muzike. Četvrtkom je održavan sportski dan, kada su organizovane razne vrste igara sa loptom, tenis i takmičenja. Petak je bio dan za učenje njemačkog jezika, kao i za pomaganje u radu domaće zadaće. Broj učesnika trenutno varira između 5 i 10.

Radionice se održavaju Omladinskom centru Brčko distrikta. Koordinator radionica u oktobru je bila Asja Subašić, uz asistenciju Weltwaerts i EVS međunarodnih volontera Jonasa Kiesnera iz Njemačke i Isambarda Rynera iz Velike Britanije.

Jezičke radionice

Kursevi engleskog i njemačkog jezika su nastavljani i u oktobru. 35 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu). Svaka grupa ima dva časa sedmično, u trajanju od devedeset minuta, a časovi se održavaju u prostorijama Omladinske organizacije Svitac i Omladinskom centru Brčko distrikta. Starost studenata je od 8 do 35 godina.

Muzičke radionice

Radionice gitare

Učesnici radionica gitare nastavili su sa radom i u oktobru. Početkom mjeseca učesnici su utvrđivali prethodno usvojeno znanje, a u drugoj polovini mjeseca uvježbavali su nove tehnike, etide i kraće kompozicije u skladu sa njihovim mogućnostima.

Radionice Sambe



Radionice Sambe održane su dva puta u oktobru. Učesnici su uživali u sviranju uvježbanih kompozicija. S obzirom na mali broj učesnika na radionici, u novembru je planirano reklamiranje ove aktivnosti, kako bi se privukao veći broj učesnika.

Alternativni hor

U septembru su učesnici alternativnog hora uvježbavali pjesmu Leonarda Cohena - „Halelujah“. 21. septembra (međunarodni dan mira) snimljen je video sa izvedbom ove pjesme u sklopu inicijative „Jedan dan - jedan hor“ (‘One Day One Choir’).

Sportske radionice

Sportske radionice za djecu mlađeg uzrasta su u oktobru nastavljene jednom sedmično, svakog četvrtka od 14:00 do 15:30 časova. Broj učesnika varira od 8-15 uzrasta 4+. Radionice su podijeljene na tri dijela. U prvom dijelu se rade vježbe zagrijavanja, u drugom vježbe za motoriku sa loptom, a treći dio je najzanimljiviji, jer se rade timske igre sa loptom.

Radionice za odrasle se održavaju utorkom i četvrtkom u Omladinskom centru od 21:00 do 22:00 časa. Trenutno ima 5 učesnika.

Koordinator sportskih radionica je Jonas Kiesner, međunarodni weltwearts volonter iz Njemačke.



Za novembar se planira nastavak svih redovnih radionica Omladinske organizacije Svitac.



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: kult@mladi.org

Tel.: 033 778 778; fax: 033 778 779

Web: www.mladi.org

Uručen školski pribor šticeenicima Zavoda za zbrinjavanje mentalno invalidne djece i omladine Pazarić.

Predstavnic/ce Instituta za razvoj mladih KULT, uručili su donaciju u školskom priboru šticeenicima Zavoda za zbrinjavanje mentalno invalidne djece i omladine Pazarić. Prosjek godina šticeenika Zavoda je 40. Mnogi od njih u Zavodu su od malih nogu, tu su i odrasli. Jedan od njih je i Vernes koji je ljubazno pomogao da se prenese školski pribor koji će šticeenici Zavoda Pazarić koristiti u svojim radionicama.

Donaciji koju su dostavili predstavici/ce Instituta za razvoj mladih KULT, obradovali su se, kako najmlađi, tako i stariji šticeenici. Koristit će ga, kažu, u raznim kreativnim radionicama crtanja, slikanja ili pisanja, koje se svakodnevno održavaju u paviljonima. Donacija se sastoji od školskog pribora i radnih materijala: plastelina, bojica, hemijskih i grafitnih olovaka, blokova, krep traka, vodenih bojica, ljepila, makaza, drustvenih igrica, slagalica i td.

Sabina Čajić iz Zavoda Pazarić kaže da tu živi oko 336 korisnika svih uzrasta, i da je bitan segment rada i edukacije, u skladu sa njihovim mogućnostima, pomoć u školskom priboru. „Svaka pomoć nama je dobrodošla. Zahvaljujemo se prijateljima iz Instituta za razvoj mladih KULT, koji su ovom donacijom omogućili da naši školarci u Zavodu lakše i brže pišu i crtaju, te da na taj način boje svoj svijet šarenim bojama“ – istakla je Sabina Čajić, referentica za odnose s javnošću Zavoda za zbrinjavanje mentalno invalidne djece i omladine Pazarić. Dodaje da su Zavodu uvijek najpotrebnije donacije u pelenama za odrasle, lijekovima, te hrani.

Školski pribor doniran je u sklopu međunarodne obrazovne inicijative “aces - Academy of Central European Schools”, a donaciju je uručio Institut za razvoj mladih KULT. Pribor je doniran nakon održavanja aces Kick-Off sastanka u Sarajevu, početkom oktobra, 2015. godine. Inicijativu aces pokrenula je ERSTE fondacija (Beč, Austrija), a koordinator inicijative je Interkulturelles Zentrum (Beč, Austrija), u saradnji s VČELÍ DOM (Bratislava, Slovačka).



Budući omladinski radnici/ce: Za više sretnih i zadovoljnih mladih

Nakon što su dva modula Obuke stručnih saradnika/ca za rad s mladima uspješno završeni, u toku je treći modul „Socijalne kompetencije i organizacijske vještine“. Obuka, u kojoj učestvuje 26 mladih ljudi iz cijele Bosne i Hercegovine, održava se u Obrazovno rasonodnom centru za mlade SPAJALICA.

Ova obuka za stručne saradnike za rad s mladima, druga je po redu koju organizuje Institut za razvoj mladih KULT. Cilj je stvaranje kadra koji će moći stručno raditi sa mladima, kojima društvo ne posvećuje dovoljno pažnje. Jasmina Keserović iz Velike Kladaše kaže da je ova obuka potakla da se više trudi i radi u oblasti omladinskog rada i da će znanja i vještine koje je stekla i koje će još steći do kraja obuke primijeniti u Demokratskoj organizaciji mladih iz Velike Kladaše u kojoj radi. Sličnog je mišljenja i Elma Karahodžić iz Tešnja. „Jako mi je drago što sam ovdje. Upoznala sam mnogo različitih ljudi iz različitih gradova, a pored toga, mnogo sam naučila. Sigurna sam da će mi ovo znanje itekako dobro doći u budućnosti. Meni lično, jer ću ga moći praktično primijeniti u lokalnoj zajednici iz koje dolazim“ – kaže Elma Karahodžić iz Tešnja.



Treći modul obuke posvećen je učenju o socijalnim kompetencijama i organizacijskim vještinama. Predavači su Senka Čimpo i Jasmin Bešić. Organizatori obuke, predstavnici Instituta za razvoj mladih KULT, jako su zadovoljni samom obukom, ali i odabranim učesnicima. „Sudeći po reakcijama učesnika, vidljivo je da su svi zadovoljni. Vidljiva je volja za učenjem i usvajanjem novih znanja i vještina i to je možda najvažnije. Ovaj modul sastoji se od dvije teme. Prvu, socijalne kompetencije predavala je Senka Čimpo. Naši polaznici, radeći na sebi, učili su kako da rade s mladima. Druga tema, koja počinje danas,

posvećena je organizacijskom menadžmentu. Jasmin Bešić polaznicima će objasniti, od naprimjer, kako da organizuju volontere, do toga kako da organizuju svoju organizaciju“ – istakla je Katarina Vučković iz Instituta za razvoj mladih KULT.

Da su polaznici zadovoljni, potvrdio je i Eldar Komar iz Sarajeva. Kaže da su tematske cjeline usklađene s potrebama rada s mladima. „Iskusni predavači sa zanimljivim metodama rada, polaznicima pružaju mogućnost za kreativno izražavanje, razmjenu iskustava i sticanje novih znanja“ – dodao je Eldar Komar iz Inicijative mladih za ljudska prava u BiH.

Ipak, najvažnije je, složili su se polaznici obuke, da sva znanja i vještine koje steknu, prenesu dalje i tako unaprijede rad s mladima u lokalnim zajednicama. Tijana Grujičić iz Prijedora kaže da će definitivno u budućnosti raditi bolje. Svoje znanje sada će, kaže, prenijeti kolegama u svojoj organizaciji. „Rezultat će, nadam se, biti više sretnih i zadovoljnih mladih u Prijedoru“ – dodaje.

Stop trgovini ljudima

Povodom Evropskog dana borbe protiv trgovine ljudima, u prostorijama Obrazovno-razvodnog centra za mlade SPAJALICA, održano je predavanje na temu trgovine ljudima. Predavanje je organizovao Institut za razvoj mladih KULT, u saradnji sa Nadbiskupijskim centrom za pastoral mladih „**Ivan Pavao II.**“, Josip Milanović, djelatnik Nadbiskupijskog centra, sa učenicima Srednje tehničke škole grafičkih tehnologija, dizajna i multimedije, razgovarao je o temi trgovina ljudima. Kroz zanimljive i sadržajne radionice, učenici su predstavili jedni drugima problem trgovine ljudima prisutan u Bosni i Hercegovini, te obećali kako će stečeno znanje prenijeti svojim vršnjacima, te biti dio globalne kampanje kada je riječ o borbi protiv trgovine ljudima.

Predstavnici Nadbiskupijskog centra za pastoral mladih „**Ivan Pavao II.**“ zahvalili su se Institutu za razvoj mladih KULT na pozivu, te učenicima Srednje tehničke škole grafičkih tehnologija, dizajna i multimedije na sudjelovanju, te uključivanju u neformalnu edukaciju mladih s ciljem educiranja i kreiranja dobrog i kvalitetnog sadržaja za mlade.

Evropski dan borbe protiv trgovine ljudima obilježava se svake godine, 18. oktobra. Ovaj dan proglasila je Evropska komisija, uz preporuku Evropskog parlamenta, 2007. godine radi jačanja svijesti javnosti i donosilaca odluka o potrebi donošenja boljih politika prevencije i borbe protiv trgovine ljudima.



Polaznici Škole prijateljstva posjetili Svrzina kuću

Dječaci i djevojčice, polaznici Škole prijateljstva, u subotu su posjetili muzej Svrzina kuća. Njih 25-ero prvi su put vidjeli kuću izgrađenu u tradicionalnom bosanskom stilu sa kraja 18.stoljeća. Djeca su sa velikim interesovanjem pažljivo slušala o načinu života gradske bosanske porodice s kraja 18. i kroz 19. stoljeće. Njihovu pažnju su privlačili mnogobrojni izloženi predmeti iz spomenutog perioda, te su imali mnogo pitanja o načinu života njihovih vršnjaka u tom periodu.

Kuću je sagradila ugledna sarajevska porodica Glođo, čiji je jedan od članova poznati kadija Munib ef. Glođo bio poznat po borbi za autonomiju Bosne u okviru Osmanskog carstva. Ostavši bez muških nasljednika, kuća porodičnim vezama prelazi u vlasništvo također ugledne porodice Svrzo. Svrzina kuća predstavlja tipični primjer arhitekture tog vremena, podijeljena na selamluk – javni dio i haremluk – porodični dio. Otkupljena od porodice Svrzo, sanirana i otvorena za javnost šezdesetih godina. Kuća je sredinom devedesetih godina rekonstruisana i ponovo otvorena za javnost 1997. godine. Tokom 2005. godine izvršena je još jedna veća rekonstrukcija objekta, prije svega sanacija krova, kaldrme, dotrajalih instalacija i vraćanje slikarija na musandari u Velikom halvatu, koje su vremenom izgubile boju. Za ovaj spomenik kulture Muzej je izdao Monografiju Svrzina kuća na bosanskom i engleskom jeziku.





www.pronibrcko.ba

PRONI Centar za omladinski razvoj
Mehmedagića 24, 76 100 Brčko distrikt BiH
Tel./Fax: 00 387 49 217 695
E-mail: pronibrco@teol.net
www.pronibrcko.ba

Ulična akcija/promocija "Infoteka" i "LVS Bijeljina"



U srijedu, 28.10. održana je konferencija za medije i ulična akcija sa ciljem promocije projekta „Razvoj volonterizma u sjeveroistočnoj BiH“. Projekat realizuje PRONI Centar za omladinski razvoj u partnerstvu sa OKC Banja Luka, a uz finansijsku podršku Američke ambasade u BiH.

Oko 40 mladih koji su se taj dan okupili ispred platoa Centra za kulturu Bijeljina, imali su priliku da se druže sa svojim vršnjacima, saznaju za nove mogućnosti volontiranja u Bijeljini, da izraze svoje mišljenje na temu volonterizma i omladinskog aktivizma na području grada, kao i da na licu mjesta popune upitnik i prijavu za volontera, i budu dio ekipe Lokalnog volonterskog servisa i Infoteke.


Tim povodom organizovana je i nagradna igra sa ciljem promocije Omladinskog info centra „INFOTEKA“.

Nagradna igra će trajati narednih 7 dana (do 4.11.), a pravila igre su sljedeća:

1. Skeniraj QR code i prati nas na FB page „INFOTEKA“
2. Postavi svoju fotografiju na kojoj će se vidjeti logo „INFOTEKA“ sa komentarima #volonterizam#Infoteka#LVS Bijeljina
3. Pozovi prijatelje da lajkuju FB page i tvoju fotografiju Fotografija sa najviše lajkova, dobija selfi štap!

Seminar u Mostaru – Socijalno uključivanje mladih

Omladinski klub Omerbegovača i Harun Šabanović učestvovali su na seminaru o socijalnom uključivanju mladih u Jugoistočnoj Evropi. **Beyond Barriers**. Seminar se održava u sklopu predsjedavanja Bosne i Hercegovine Vijećem ministara Vijeća Europe, u suorganizaciji Ministarstva civilnih poslova BiH i Komisije za koordinaciju pitanja mladih u BiH. Pored Haruna, jedan od panelista na seminaru bio je i generalni menadžer PRONI Centra, Jasmin Jašarević.



Interkulturalno učenje mladih



Od 5. do 13. decembra/prosinca 2015. PRONI i partnerske organizacije održavaju trening za omladinske radnike/ce, projekt koordinatore/ce i savjetnike/ce mladih u Palermu, Italija. Tema je: interkulturalno učenje mladih, rješavanje konflikta, rad s mladima za vrijeme kriznih situacija.

ERASMUS+ razmjena omladinskih radnika Kipar.

Tri dugogodišnja volontera PRONI-ja, Benjamin Tahto, Dejan Rađen i Nikola Kerezović imali su priliku edukovati se, putovati i predstavljati PRONI Centar za omladinski razvoj Brčko, kroz program ERASMUS+, finansijski podržan od strane Europske Komisije.

Trening pod nazivom "Know-Go-Show-The Way" održan je u periodu od 01.10.-07.10.2015. u gradu Larnaca (Kipar). Domaćin treninga je bila organizacija "SEAL CYPRUS".

Trening je uključivao 45 mladih iz 13 zemalja (BiH, Kipar, Litvanija, Latvija, Ukrajina, Poljska, Španija, Italija, Estonija, Moldavija, Rumunija, Grčka i Malta). Mladi iz ovih zemalja imali su priliku da uče o liderstvu, i tome kako biti pozitivan primjer u svojoj lokalnoj zajednici, te kako bi imali pozitivan uticaj na mlade. Pored toga, mladi su imali priliku upoznati različite kulture, sklopiti nova prijateljstva i razmijeniti kontakte i iskustva za neke buduće projekte.





H.O. Muslimansko dobrotvorno društvo - MERHAMET DOBOJ
Kralja Aleksandra 17, 74 000 Doboj
Tel./fax: 053 226 886
E-mail: merhamet.doboj@cutuk.net
Web: www.ngo.ba

Aktivisti "Merhameta" Doboj učestvovali su u obilježavanju 5. sajma "**Žene sa sela**", koji je održan u Doboju 15.10.2015 godine.



H.O."Merhamet" Doboj obilježio je 17 oktobar - svjetski dan borbe protiv siromaštva podjelom humanitarne pomoći za članove "Merhameta" Doboj.



Volonteri "Merhameta" Doboj: Zumra Hadžić, Melisa Mujanović i Damir Školjić učestvovali su u obilježavanju 17. oktobra 2015 - Međunarodnog dana borbe protiv siromaštva, koji je organizovala omladinska organizacija „Šesto čulo" Doboj, u suradnji sa Arigatou International / GNRC - Global Network of Religions for Children.





U hotelu "Integra" u Doboju je 19.10. 2015. godine održan je radni sastanak članica Koalicije "Tolerantno i pozitivno iz Doboja" sa članovima Tima za izradu Akcionog plana za koheziju u zajednici Grada Doboja. Na sastanku, kojem je prisustvovala i volonterka "Merhameta" Doboj Mirnesa Bećirodobašić, razgovarano je i o planiranim aktivnostima povodom 16. Novembra - dana tolerancije.

Predsjednica "Merhameta" Doboj Avdić Faketa prisustvovala je Promociji Zbornika "Živjeti sa poplavama" koja je održana 20.10.2015 godine u hotelu "Integra" u Doboju.

Volonterka "Merhameta" Doboj Amra Mišić prisustvovala je radionici "Kreiranje političkog imidža i preduslova za uspjeh u politici za žene u političkim partijama" koju je organizovala FONDACIJA "CURE" iz Sarajeva 24.10.2015 godine u Tešnju.



Volonterke "Merhameta" Doboj: Mirnesa Bećirodobašić i Semra Jašarević prisustvovala su radionici "Smanjenje rizika od katastrofa", održanoj 26.10. u hotelu Integra u Doboju, a koju su organizovali: "MDP INICIJATIVE" uz podršku "CARE" organizacije.



Predsjednica Merhameta Doboј Avdić Faketa prisustvovala je 26. oktobra sastanku u Opštini Doboј, kao član sektorske radne grupe za izradu plana društvenog razvoja grada Doboјa.



Volonteri "Merhameta" Doboј prisustvovali su okruglom stolu: "Zajedno možemo okončati siromaštvo djece širom svijeta!" u okviru obilježavanja "Međunarodnog dana borbe protiv siromaštva Doboј 2015", koji je organizovala Omladinska organizacija „Šesto čulo" Doboј, u suradnji sa Arigatou International / GNRC - Global Network of Religions for Children i sa udruženjem za porodice sa četiri i više djece „Budućnost 4+" Doboј, u Jevrejskom Kulturnom Centru Doboј 27.10.2015 godine.



LJUBICA MLAĐENOVIĆ, referent za mlade
GRADSKA UPRAVA BIJELJINA
E-mail: ljubica.mladjenovic@gmail.com

Gradska uprava Grada Bijeljina objavila je Javni poziv za dodjelu priznanja grada za volonterski aktivizam. U toku je dostavljanje aplikacija za volontere i organizatore volontiranja. Gradska uprava je jedna od tri opštine /grada koje dodjeljuju ova priznanja. Svečana dodjela priznanja obaviće se na Međunarodni dan volontera 05.12.2015. godine. Ovo je četvrta godina zaredom da gradska uprava dodjeljuje ova priznanja.





MOSTARSKI TEATAR MLADIH
Maršala Tita 135, 88000 Mostar
Tel.036 558 485, fax: 036 558 486
E-mail: cdo@bih.net.ba, sejodjulic@gmail.com

18. MEĐUNARODNA KONFERENCIJA

"INKLUZIJA U OBRAZOVANJU"

Mostar, 26, 27. i 28. februar 2016. godine
(referati, radionice, razgovori, diskusije, izložbe, predstave...)

Prijave do 15.januara 2016. godine

Čekamo Vas!



SAOPŠTENJA / INFORMACIJE / DONATORI / POZIVI

1. IV poziv u 2015. godini za dostavljanje projektnih prijedloga na MAB program

Omladinska Fondacija Schüler Helfen Leben Sarajevo, otvorila je IV poziv za dostavljanje projektnih prijedloga na program **Movements Across Borders „MAB“** za 2015. godinu, koji je fokusiran na osnaživanje, povezivanje i zajednički angažman mladih osoba iz Bosne i Hercegovine i Srbije.

Informacije o programu Movements Across Borders (MAB)

„MAB“ ima za cilj ojačati saradnju i međusobno povjerenje između mladih iz Bosne i Hercegovine i Srbije, kroz pripremu i realizaciju zajedničkih aktivnosti iz oblasti omladinskog angažmana, koje sadrže komponentu *grassroots* pristupa. Ciljna skupina Programa su mladi u starosnoj dobi od 14 do 28 godina, koji su aktivni u nekoj neformalnoj grupi ili omladinskoj organizaciji.

Generalni ciljevi Programa su:

- Uspostavljanje, ili daljnji razvoj zajedničkog socijalnog (društvenog) angažmana između mladih iz BiH i Srbije starosne dobi od 14 do 28 godina;
- Promoviranje aktivizma mladih kroz zajedničke *grassroots* aktivnosti, koje doprinose solidarnosti, multikulturalnosti, multietničnosti i toleranciji mladih;
- Uspostavljanje društvene kohezije i kulturne razmjene mladih, koja omogućava mladim osobama da pokažu svoju kreativnost i inovativnost;
- Kreiranje prostora za mlade u kojem će moći realizirati svoje aktivnosti;
- Aktivizam i volonterizam mladih;
- Razvoj lokalne zajednice kroz *grassroots* pristup.

Kakve projektne ideje podržava Fondacija SHL kroz program MAB?

Fondacija SHL će podržati projektne ideje mladih koji sadrže sljedeće tačke:

- Projektne aktivnosti usklađene s ciljevima „MAB“ programa;
- Projektne prijedlog zajednički su kreirali mladi iz BiH i Srbije;
- Projektne prijedlog sadrži *grassroots* aktivnosti;
- Projektne aktivnosti se realiziraju u dvije faze, jedna faza se održava u BiH, a druga faza projekta u Srbiji;
- Organizacije / aplikanti će koristiti model "lokalni domaćin" (grupa iz BiH prilikom realizacije aktivnosti odsjeda u kućama svojih vršnjaka u Srbiji, i obrnuto);
- Sve aktivnosti u sklopu projekta se realiziraju na volonterskoj osnovi;
- Koordinator/ice projekta su u starosnoj dobi od 14 do 28 godina;
- Realizacija projekta maksimalno traje 8 mjeseci;
- Budžet projektnog prijedloga ne može prelaziti iznos veći od 5.000 KM;
- Projektne prijedlog dostavljen u oficijelnoj prijavnici programa MAB.

Ko može učestvovati u Programu

Program MAB je kreiran za omladinske organizacije iz Bosne i Hercegovine i Srbije i neformalne grupe (koje mogu prijaviti svoje projektne prijedloge preko registriranih udruženja građana), koje apliciraju u partnerstvu. Ako nemate partnersku organizaciju možete popuniti informativni obrazac koji možete preuzeti na ovom [linku](#), a Fondacija SHL će nastojati da pronađe vašeg potencijalnog partnera s kojim možete aplicirati na MAB program.

Način prijave

[Prijavnicu za MAB program](#) možete preuzeti na web stranici Fondacije SHL www.shl.ba, te istu dostaviti putem e-maila: mab@shl.ba. IV Poziv za dostavljanje projektnih prijedloga na MAB program otvoren je do 10. novembra, 2015. godine. Svi aplikanti će biti informirani o statusu svoje prijave.

Više informacija na: <http://shl.ba/index.php/lat/novosti/item/153-iv-poziv-u-2015-godini-za-dostavljanje-projektih-prijedloga-na-mab-program>

2. Pozivi za projekte osoba sa invaliditetom

U cilju ostvarivanja finansijske podrške, unaprijeđivanja profesionalne rehabilitacije i zapošljavanja osoba sa invaliditetom u 2015. godini, Fond za profesionalnu rehabilitaciju je objavio dva Javna poziva.

Prvi javni poziv se odnosi na finansiranje, odnosno sufinansiranje programa i projekata razvoja privrednih društava za zapošljavanje osoba sa invaliditetom i zaštitnih radionica, finansiranje/sufinansiranje programa i projekata profesionalne rehabilitacije nezaposlenih osoba sa invaliditetom, kao i finansiranje/sufinansiranje programa i projekata održivosti nivoa zaposlenosti osoba sa invaliditetom koje obavljaju samostalnu djelatnost, uključujući i osobe sa invaliditetom koje su zaposlene prema rodbinskoj vezi, u skladu sa članom 56. stav 2. i 3. Zakona o profesionalnoj rehabilitaciji, osposobljavanju i zapošljavanju osoba sa invaliditetom.

Pomenuti Poziv je otvoren za privredna društva za zapošljavanje osoba sa invaliditetom, zaštitne radionice, i druga pravna lica, a također i za osobe sa invaliditetom koje obavljaju samostalnu djelatnost.

Drugi javni poziv se odnosi na dodjelu novčanog stimulansa za novo zapošljavanje osoba sa invaliditetom, odnosno samozapošljavanje, na čije pravo učešća imaju svi registrovani subjekti u FBiH, uključujući privredna društva za zapošljavanje osoba sa invaliditetom i zaštitne radionice, a koji kao poslodavci prihvate da zaposle jednu ili više osoba sa invaliditetom, čiji stepen invaliditeta je 60% i više ili osobu/e sa umjerenom ili lankom mentalnom retardacijom (intelektualnim teškoćama) na period od najmanje 12 mjeseci, a koje su nezaposlene prije podnošenja zahtjeva.

Javni poziv za dodjelu novčanog stimulansa ostaje otvoren 30 dana od dana objavljivanja, zaključno sa 20.11.2015. godine, a javni poziv za finansiranje programa i projekata 20 dana od dana objavljivanja, zaključno sa 10. 11. 2015. godine.

U rubrici **Javni pozivi** možete preuzeti integralne tekstove Poziva sa pratećim aplikacionim Obrascima, a u rubrici **Legislativa** sve akte na osnovu kojih su objavljeni Javni pozivi.

Preuzeto sa: <http://uspon.ba/novost/9558/otvoreni-ii-javni-pozivi-u-2015.-godini>

Izvor: Facebook grupa ekonomsko osnaživanje

žena, <https://www.facebook.com/groups/196250773860833/200636330088944>

3. Poziv nevladinim organizacijama za dostavu projekata

U ponedjeljak, 19. oktobra 2015. godine u "Oslobođenju" je objavljen javni poziv za finansiranje i sufinansiranje projekata udruženja i fondacija sredstvima budžeta Općine Centar za 2016. godinu.

Rok za podnošenje prijave je 13. novembar 2015. godine.

Projekti nevladinih udruženja i fondacija koji bi mogli dobiti finansijsku podršku iz općinskog budžeta treba da budu namijenjeni građanima općine Centar i da se odnose na oblasti: socijalna pitanja i zdravstvo, obrazovanje, kultura, ekologija, razvoj lokalne zajednice, promocija demokratskih principa, tradicionalne manifestacije koje promoviraju Općinu Centar.

Tekst javnog poziva, kao i uputstvo za aplikante, kriteriji, obrazac za prijavu projekta i izjava dostupni su i na [stranici Općine Centar](#) u rubrici "Konkursi i oglasi".

Izvor: <http://www.hocu.ba/index.php/hocu.priliku/poziv-nevladinim-organizacijama-za-dostavu-projekata/>

4. Edukacija Centra za liderstvo i poduzetništvo

Sticanjem određenog nivoa obrazovanja, životni put čovjeka se ne završava. Jedna od važnijih promjena koje su se desile u posljednjem periodu jeste i neformalno obrazovanje. Analizirajući tržište rada, dolazi se do zaključka da je formalno obrazovanje fokusirano, u velikoj mjeri, na jačanju jedne vrste vještina (poznatih pod imenom hard skills). Savremeno tržište kao i sami poslodavci smatraju da je ova vrsta vještina poprilično izjednačena kod ljudi, dok kao odlučujući faktor kod izbora postaju „meke vještine“ (soft skills). Bilo da ste inženjer, novinar, ekonomista ili pravnik, u većini slučajeva ćete postati dio neke organizacije. Stoga, program razvoja poslovnih vještina vam omogućava:

- upoznavanje sa menadžmentom i organizacijom
- jačanje komunikacijskih i liderskih vještina
- spoznaju prilika koje se nude u oblasti poduzetništva
- izradu poslovnih planova
- vođenje projekata

Razvoj Vas, kao ljudskog kapitala, jednako je važan kao i razvoj same kompanije. Business Development Program je „paket“ napravljen sa ciljem jačanja ličnih i profesionalnih vještina učesnika u polju savremenog biznisa. U sklopu našeg programa nudimo treninge iz tri veoma važne oblasti: Liderstvo, Poduzetništvo i Projekt menadžment.

Cijena po jednom modulu: 100 KM

Info

Tel: +387 33 957 188

+387 33 957 423

Mail: lec@ius.edu.ba

5. Расписани конкурси у области спорта

Министарство породице, омладине и спорта расписало је четири конкурса у области спорта у оквиру којих ће бити подијељена средства у износу од 340 000 КМ.

Расписани су конкурс за суфинансирање активности спортских организација са сједиштем у Брчко Дистрикту БиХ у 2015. години, конкурс за суфинансирање активности спортских организација лица са инвалидитетом и појединаца спортиста са инвалидитетом са сједиштем у Републици Српској у 2015. години, конкурс за суфинансирање пројеката изградње, реконструкције и санације спортских објеката или терена на територији Републике Српске у 2015. години и конкурс за суфинансирање активности спортских организација са сједиштем у Републици Српској у 2015. години.

У оквиру конкурса за суфинансирање активности спортских организација са сједиштем у Брчко Дистрикту БиХ у 2015. Години биће извршена расподјела буџетских средстава у укупном износу од 50.000КМ за суфинансирање спортских активности, у износу од 500 КМ до 10 000 КМ по пројекту, које се односе на учешће на званичним првенствима Републике Српске или БиХ, учешће на међународним такмичењима и организацију традиционалних спортских манифестација или турнира међународног и републичког значаја.

У оквиру конкурса за суфинансирање активности спортских организација лица са инвалидитетом и појединаца спортиста са инвалидитетом са сједиштем у Републици Српској у 2015. години биће извршена расподјела буџетских средстава у укупном износу од 50 000 КМ за суфинансирање спортских активности, у износу од 500 КМ до 10 000 КМ по пројекту, које се односе на учешће на међународним такмичењима, учешће на првенствима/куповима Републике Српске или БиХ, појединце спортисте са инвалидитетом за учешће на међународним такмичењима и организацију традиционалних спортских манифестација или турнира међународног и републичког значаја.

У оквиру конкурса за суфинансирање пројеката изградње, реконструкције и санације спортских објеката или терена на територији Републике Српске у 2015. години биће извршена расподјела буџетских средстава у укупном износу од **90.000 КМ** врши се за суфинансирање пројеката изградње, реконструкције и санације спортских објеката или терена на територији Републике Српске у износу од **500 КМ до 10.000 КМ по пројекту**, а који се односе на изградњу спортских објеката или терена и реконструкцију и санацију спортских објеката или терена.

У оквиру конкурса за суфинансирање активности спортских организација са сједиштем у Републици Српској у 2015. Години биће извршена расподјела буџетских средстава у укупном износу од **150.000 КМ** за суфинансирање спортских активности у износу од **500 КМ до 15.000 КМ** по пројекту, а које се односе на организацију традиционалних спортских манифестација или турнира међународног и републичког значаја и учешће на међународним такмичењима. Сви конкурси су отворени 30 дана од дана објављивања.

Сви заинтересовани конкурсе могу пронаћи на сајту Министарства породице, омладине и спорта (www.vladars.net -> Министарства -> Министарство породице, омладине и спорта -> Документи -> конкурси).

Потребни обрасци налазе се на сајту Министарства – www.vladars.net – >

Izvor: <http://www.vladars.net/sr-SP-Cyrl/Vlada/Ministarstva/mpos/media/vijesti/Pages/Raspisani-konkursi-u-oblasti-sporta.aspx>

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design

Webmaster:

Emir Delalić-Zeko -
Tuzla

emir.delalic@gmail.com

web: www.omladina-bih.net

mejling lista Mreže:

posta@omladina-bih.net

Adrese za slanje vaših informacija za mjesečni bilten:

hcatuzla@bih.net.ba; orcuzla@bih.net.ba

fax: 035 258 077

Omladinski resursni centar Tuzla

Hadži Bakirbega Tuzlića 1,
75000 Tuzla

tel / fax: 035 258 077

e-mail: orcuzla@bih.net.ba

hcatuzla@bih.net.ba

Mjesečni bilten uređuje Omladinski resursni centar - ORC Tuzla